

Här Fernand Etgen
President vun der Chamber

Lëtzebuerg, de 4. Januar 2024

Här President,

Esou wéi den Artikel 80 vum Chambersreglement et virgesäit, biede mir Iech, dës parlamentaresch Fro un den Här Minister fir Educatioun, Kanner a Jugend an un den Här Minister fir bannenzeg Sécherheet weiderzeleeden.

Am Saarland soll eng nei Formatiounsoffer duerch d'Schafe vun enger sougenannter „Fachoberschule“ jonk Leit motivéieren, eng Ausbildung bei der Police ze maachen.

De Personalmanckem ass och bei der Lëtzebuenger Police e Problem. Och hei am Land musse méi jonk Leit fir d'Police-Beruffer ausgebild ginn. An deem Kontext sief drun erënnert, dass d'CSV schonn e puer Mol d'Aféierung vun engem entsprecheden Optiounsfach am Enseignement secondaire proposéiert huet, fir d'Schüler iwwer dee Wee fir d'Sécherheitsberuffer ze sensibiliséieren.


Virun dësem Hannergrond wëlte mir folgend Froen un den Här Minister fir Educatioun, Kanner a Jugend an un den Här Minister fir bannenzeg Sécherheet riichten:

- Ass der Regierung dat beschriwwent Konzept aus Däitschland bekannt?
 - Wa jo, ënner wéi enger Form kéint esou e Konzept zu Lëtzebuerg implementéiert ginn?
- Féiert d'Regierung aktuell Iwwerleeungen, fir jonk Leit fréizäitig a Richtung Police-Ausbildung ze guidéieren?
 - Wa jo, a wéi eng Richtung ginn dës Iwwerleeunge konkret?
 - Wann net, firwat net?

Här President, mir bieden Iech, eisen déifste Respekt unzehuelen.



Martine Hansen
Co-Fraktiounspresidentin



Léon Gloden
Deputéierten



Gemeinsam Äntwert vum Minister fir Educatioun, Kanner a Jugend, Claude Meisch, a vum Minister fir bannenzeg Sécherheet, Henri Kox, op d'parlamentaresch Fro Nr. 7439 vun den honorabelen Deputéierte Martine Hansen a Léon Gloden

De Sujet, dee vun den Auteure vun der parlamentarescher Fro opgeworf gëtt, ass effektiv net nei. Den 19. Mee 2020, am Kontext vum *Débat de consultation* iwwert d'Reform vun der Police grand-ducale, huert den honorabelen Deputéierte Léon Gloden eng Motion deposéiert, déi d'Regierung invitéiert « *à étudier la possibilité d'introduire une section respectivement division « sécuritaire » dans l'offre scolaire de l'enseignement secondaire* ».

Doropshin ass en Aarbechtsgrupp zesummegezat ginn aus Vertrieder vum Ministère de la Sécurité intérieure, der Police grand-ducale, dem Ministère de l'Intérieur, dem CGDIS, dem Ministère des Affaires étrangères, der Lëtzebuerger Arméi, dem Ministère de la Justice, der Administration pénitentiaire an dem Ministère de l'Éducation nationale, de l'Enfance et de la Jeunesse.

An dräi Aarbechtsséitzungen (30. Mäerz, 3. Juni a 17. September 2021) hunn déi uewe genannten Acteuren hir jeeweileg Besoinen duergestallt an déi verschidde Carrièren an hir Zougangscritère matenee verglach. Dobäi hunn si festgestallt, datt d'Aféierung vun enger schoulescher Offer, déi op d'Carrièren am Beräich vun der Sécurité géif virbereeden, net opportun wier, dëst an der Haaptsaach well déi spezifesch Kompetenze fir déi verschidde Carrièren zevill ënnerschiddlech sinn.

Dëst gëllt och, wann een sech op d'Carrière vun der Police beschränkt, déi den honorabelen Deputéierten als "Police-Beruffer" bezeechent: Kompetenzen, déi fir all Carrière nützlich sinn, sief et am Beräich vun de Sproochen, der Mathematik oder der Éducation civique, ginn an der Schoul souwiesou vermëttelt.

Et ass zeréckbehalen ginn, datt déi gefroten Ziler duerch d'Offer vun der Formation continue, der Upassung vun de Rekrutementsprozeduren an duerch speziell intern Formationne respektiv Stage kéinten ereescht ginn. De Rapport vun dësem Aarbechtsgrupp gouf der Chamber présentéiert.

D'Regierung féiert deemno keng Iwwerleeungen, fir eng Ausbildung am Beräich vun de "Police-Beruffer" anzeféieren. Dëst heescht awer net, datt déi jonk Leit net géife fir dës Beruffer sensibiliséiert ginn: Et sief an dësem Kontext op d'Orientatioun opmierksam gemaach, déi deene Jonken ëmmer erëm am Verlaf vun hirer schoulescher Ausbildung offréiert gëtt. Police an Arméi mat hire verschiddene Carrière spillen hei eng wichteg Roll a sinn och bei enger ganzer Rei vu Manifestatiounen selwer present.

Wat d'Sécherheitsberuffer betrëfft, sou gëtt am Beräich vun der Formation professionnelle aktuell en "DAP-Gardiennage" ausgeschafft. Eng Équipe curriculaire ass mat de konkreten Aarbechten dofir befaasst.

Lëtzebuerg, de 17. Januar 2023

De Minister fir Educatioun,
Kanner a Jugend

(s.) Claude MEISCH